

Noticia
Transparente
di Gobierno

ISLA ONLINE

Diaranson 31 Juli 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



REINO HULANDES TA UNI NA COMUNIDAD INTERNACIONAL

Ta haci un apelacion pa transparencia completo den e proceso di eleccion y den e maneho di e resultado na Venezuela



Diadomingo 28 di juli, a tuma luga na Venezuela e Eleccion Presidencial 2024. E pueblo di Venezuela, masalmente a acudi na urnanan electoral pa haci uzo di nan derecho di voto pa eligi nan presidente.

Na Aruba tambe, tawata tin mas di 1300 ciudadano Venezolano registra pa vota, sinembargo un poco mas di 500 di e votadonan aki a haci uzo di nan derecho pa vota. Prome Minister Evelyn Wever-Croes ta gradici tur e votadonan y Consolado di Venezuela na Aruba cu a organisa y a percura pa tur cos bay bon y trankil. Esaki, manera conoci, no ta e caso na Venezuela.

Ta di lamenta, Prome Minister a expresa, cu na Venezuela na final di atardi y despues cu e resultado oficial a dreña, a

causa hopi polemica. E comunidad internacional, den esaki Aruba y Reino Hulandes tambe, tin duda si e resultado cu a wordo publica ta refleha e realidad di e votacion y ta pidi pa transparencia.

Prome Minister: “E boluntad democratico di e pueblo di Venezuela mester wordo respeta. Tanto na Aruba como den henter Reino, nos ta preocupa pa e desaroyonan desde diadomingo anochi despues cu e anuncio oficial di resultado di Eleccion Presidencial a wordo publica. Reino Hulandes ta uni na comunidad internacional cu ta haci un apelacion pa transparencia completo den e proceso di eleccion y den e maneho di e resultado. Pa loke ta Aruba, nos ta preocupa y ta sigui hopi di cerca y cu hopi alerta, e desaroyonan di e ultimo oranan na Venezuela”.

Aruba tin e frontera cu Venezuela cera caba te cu fin di augustus. E decision aki a wordo tuma tres luna pasa. Prome Minister a enfatisa cu tanten cu no tin estabilidad na Venezuela, lo bira mas dificil pa contempla pa habri frontera cu Venezuela bek.

Prome Minister ta pidi pueblo di Aruba completo, pa tene calmo y keda trankil. Aruba ta un pais cu ta biba di turismo. Nos ta biba di e servicio cu nos ta brinda nos bishitantenan. Na Aruba nos no por tin e espacio ni pa turbulencia ni pa intrankilidad. E situacion na Venezuela no ta un situacion nobo. Ya di e prome dia di gobernacion di Gabinete Wever-Croes na 2017, esaki tawata un problema y ta sigui ta un problema te cu awo.

“Esaki, sinembargo, no ta algo cu nos por soluciona aki na Aruba. Ban mantene calmo y trankilidad aki na Aruba. Gobierno ta preocupa pa esnan cu ta biba na Venezuela den e situacion interno actual. Nos lo sigui monitoria y ta keda alerta. Y mi ta pidi pa nos tur uni den oracion pa pronto bin un solucion na Venezuela”, Prome Minister a expresa. ■■■

Prome Minister Evelyn Wever-Croes:
Nan mes a brasa corrupcion y awor

POLITICONAN DI OPOSICION TA ATACA MINISTERIO PUBLICO PA TAPA NAN PROPIO FOUTNAN

Gabinete Wever-Croes ta para pa integridad y pa combati corrupcion

Diaranson 31 di juli durante Conferencia di Prensa di Gobierno di Aruba, Prome Minister Evelyn Wever-Croes a trata 2 punto actual di suma importancia. Un di e puntonan ta e atakenan contra Ministerio Publico.

Den e ultimo dianan a constata varios atake di politiconan di oposicion cu, ta parce di a uni pa ataca Ministerio Publico. Ministerio Publico ta un instituto totalmente independiente y hopi importante den e estado di derecho di Aruba. Ningun gobierno ta duna instruccion na Ministerio Publico. Prome Minister ta enfatisa cu Gabinete Wever-Croes sigur no ta mete den desicionnan ni procesonan di Ministerio Publico.



Si acaso tin persona cu tin duda riba esaki, Prome Minister ta informa cu tin caminda pa cana. Por haci un denuncia of cuminsa un caso pero no ta corecto pa ataca of critica Ministerio Publico. Mescos ta conta pa Departamento di Recurso Humano (DRH) cu tambe ultimamente ta wordo ataca inecesariamente y inhustamente pa politiconan di oposicion djis pa tapa nan propio erornan.

Prome Minsiter ta remarca cu pa AVP ya ta un rutina pa ataca Ministerio Publico. Lo ta bon pa e lider di e partido cuminsa wak riba nan propio erornan y realisa cu ta nan mes a brasa corrupcion y no mester ataca Ministerio Publico pa esaki. E mandatario ta sigui bisa cu mescos ta conta pa Parlamentario Marisol Tromp y Miguel Mansur, cu recientemente a manda un carta pidiendo Presidente di Parlamento Edgard Vrolijk pa yama su persona inmediatamente den Parlamento pa duna cuenta di su envolvimento den Ministerio Publico.

“Mi a pidi Presidente di Parlamento pa mi bin inmediatamente pa aclara esaki pasobra ami ni mi gobierno ta mete den Ministerio Publico. Lamentablemente mi a wordo informa cu na e momento aki Parlamentario Miguel Mansur no ta na Aruba y Parlamentario Marisol Tromp nunca ta durf di ta den e sala di Parlamento ora cu ami t’ey, pues e reunion cu nan mes a pidi p’e riba termino corto, no tin sentido”, Prome Minister a expresa.

Prome Minister ta indica cu e politiconan aki y otronan cu

ta aspira pa bira politico, ta uzando un caso disciplinario di un hefe di un departamento. E mandatario ta pone enfasis cu no ta su persona a duna publicidad na e caso disciplinario aki sino ta e politiconan oponente mes a duna publicidad cu of sin consentimiento di e hefe di departamento. E gobierno actual ta para pa integridad, pa combati corrupcion y a demostra esaki desde e prome dia di gobernacion. “Integridad ta ora cu bo ta haci lo corecto maske niun hende ta wak. Integridad ta ora bo ta cana un caminda stret a pesar cu ta hendenan cerca di bo y nos a demostra esey”, Prome Minister a enfatisa.

Prome Minister a duna di conoce cu e corrupcion cu tawatin den e aparato gubernamental durante e gabinetenan di Mike Eman, specialmente na DIP a causa hopi daño na Aruba. E ta e motibo principal pakico awe hobennan cu ta studiando den exterior y kier bin biba bek na Aruba, no por haya un tereno pa construi nan cas. Actualmente tin entre 5 pa 8 mil persona wardando pa un tereno. Varios Minister di Infraestructura den pasado a haya nan mes involucra cu husticia pa a parti tereno sin tene cuenta cu regla. Nan a haya nan mes bou investigacion y consecuentemente Ministerio Publico a paralisa e departamento e tempo ey.

“Pues nos ta para pa integridad y pa combati corrupcion y ora bo ta para pa integridad y bo ta combati corrupcion, tur bo departamentonan ta alinea den esaki y nos ta haci tur nos maximo esfuerzo pa combati corrupcion tambe.”, Prome Minister a enfatisa.

Prome Minister Evelyn Wever - Croes: **Aplicando proceduranan standard den tur caso di investigacion,** **MINISTERIO PUBLICO Y DEPARTAMENTO DI** **RECURSO HUMANO TIN UN PROTOCOL DESDE 2005**

**“Mi ta rechasa y condena e atakenan inhusto y infunda di e politiconan
contra OM, DRH y mi persona”**



Durante Conferencia di Prensa di Gobierno di Aruba diaranson 31 di juli mainta, Prome Minister Evelyn Wever-Croes a elabora riba e Protocol cu Ministerio Publico y Departamento di Recurso Humano tin ya desde 2005. Prome Minister ta referi na un caso specifico na unda cu oposicion ta purba atacha su nomber bisando cu e ta mete den Ministerio Publico.

“Ta straña mi cu e politiconan aki ta zwaai cu cantidad di papel pa bisa cu mi ta mete den Ministerio Publico pasobra Ministerio Publico y Departamento di Recurso Humano tin un protocol ya desde 2005 y e politiconan aki tawata minister e tempo ey caba, y a traha cu e protocol y mester conoce e protocol”, Prome Minister a remarca.

E protocol aki a wordo aplica den tur investigacion cu a tuma luga, ta tumando luga y cu lo tuma luga den futuro tambe pasobra ta proceduranan standard. E protocol aki a wordo aplica den casonan manera IBIS, Avestruz, Flamingo y Kukwisa. Esaki kiermeen cu no ta nada nobo sino proceduranan standard. E persona en cuestion tawata un sospechoso pa Ministerio Publico den caso Kukwisa. Y ta e propio Parlamentario Marisol

Tromp a declara cu e director di DIP e tempo ey lo a entrega un keho falso contra su persona.

Prome Minister a duna di conoce cu na e momento cu un empleado publico ta un sospechoso pa Ministerio Publico, e no ta algo di Ministerio Publico (OM) so, e ta bira algo cu ta concerni Departamento di Recurso Humano (DRH) tambe, pasobra e tin di haber cu e situacion disciplinario di e persona y e integridad di e persona. Den un caso asina, e protocol ta indica cu OM y DRH tin contacto cu otro riba cierto asuntonan, no riba e investigacion criminal pero si riba cierto informacion cu ta importante pa e caso disciplinario. Ora cu OM dicidi di seponer un caso, esta di no sigui persigui e persona manera tawata den e caso aki, e ora nan ta informa Gobierno pa locual ta importante pa e caso disciplinario.

Den e caso aki ta e propio Marisol Tromp a anuncia cu e director aki a entrega un keho falso contra su persona y p'esey e caso Kukwisa a cuminsa. Y door cu e keho tawata falso, e caso a wordo cera y Marisol Tromp no ta un sospechoso mas despues di dos aña.

Pues logico ora un director di un departamento cu ta wordo acusa di a entrega un keho falso contra su ex-minister, e ta algo cu mester haya atencion. Ademá, e caso disciplinario cu ta andando aworaki ta basa riba varios otro aspecto. Awo, cu e persona en cuestion a dicidi di comparti e informacionnan aki cu politiconan oponente pa haci politica barata cu nan, esey, Prome Minister a subraya, ta keda pa nan cuenta.

“Pero nos di nos banda, ta haci nos trabou manera mester ta. Y ora bo ta kere den integridad bo tin cu actua cu integridad, irrespecto ken e ta. Mi ta rechasa y condena e atakenan inhusto y infunda di e politiconan aki contra Ministerio Publico y Departamento di Recurso Humano y contra mi persona. Desde cu Gabinete Wever-Croes I a sinta, integridad a wordo poni central y nos departamentonan sa esey. Y ora un ambtenaar comete algo ilegal, tin consecuencia p'e. Sea ta consecuencia criminal of penal den man di OM of disciplinario den man di DRH. Esakinan ta proceduranan standard.

Mi ta lamenta cu cierto politiconan, cu pasobra nan ta wordo investiga of pa scapa nan peyeho, ta ataca institucionan importante di nos pais y ta tilda tanto OM como mi persona di ta actua fout. Mi mensahe na e politiconan aki ta pa nan bira mas serio y acepta nan propio responsabilidad pa nan propio actonan y cuminsa respeta institucionan importante di pais Aruba”, Prome Minister a enfatisa. ■■■

Prome Minister Evelyn Wever-Croes:

PROME MINISTER TA GRADICI DR. HELLEN VAN DER WAL PA SU TRABOUNAN COMO MIEMBRO DI CAFT

Exito na drs. Marion Agunbero como miembro di Aruba den CAft

Despues di 2 termino como miembro den Colegio di Supervision Financiero pa Aruba (CAft), mr. dr. Hellen van der Wal no por wordo reeligi mas y na su luga ta bin drs. Marion Agunbero entrante diahuebs 1 di augustus 2024.

Señora Van der Wal tin un historia amplio den e aparato gubernamental di Aruba entre otro den nos cuerpo policial. Desde 2004 señora Van der Wal ta traha y ta Secretaria di Raad van Advies. Su conocimiento amplio di e situacion financiero y prosesonan di presupuesto di Aruba, y a contribui grandemente na CAFT. Socialmente, Señora Van der Wal tawata hopi activo tambe den nos comunidad. Entre otro e tawata co-fundador di Telefoon pa Hubentud y a sirbi como presidente y miembro pa hopi aña. Y desde 1 di augustus 2018 como miembro di CAft.

Conseho di ministernan di Reino a aproba riba dia 21 di juni 2024 e proposicion di Aruba pa nombra señor drs. Marion Agunbero como miembro di Aruba den e Colegio di supervision financiero pa Aruba (CAft) entrante 1 di augustus 2024. Señor Agunbero tin experiencia amplio den e sector financiero y a ocupa diferente funcionnan na entre otro Banco Central, entre otro como manager seccion di supervision y tambe na Departamento di Finanzas, caminda e tabata director. E tabata director ehecutivo di e fondo di pension den e sector di turismo di Aruba y a ocupa diferente posicionnan na Caribbean Mercantile Bank N.V., entre otro como assistant managing director retail products. Actualmente e ta miembro di e Conseho di Comisario di Caribbean Mercantile Bank N.V. y miembro di e Conseho Consultativo di Aruba unda e lo tuma su retiro pa asumi e cargo nobo como miembro di CAft.

Prome Minister, den nomber di Gobierno di Aruba, ta gradici sra. Van der Wal pa tur e trabou cu el'a desplega den CAft den nomber di pais Aruba, y ta desea sr. Agunbero hopi exito.





BAKI DEN BARIO TA SIGUI CONSCIENTISA COMUNIDAD Ariba E IMPORTANCIA DI SEPARACION DI DESPERDICIO



Diasabra ultimo Baki den Bario tabata na Savaneta unda a ricibi alrededor di 450 vehiculo cu tabata dispuesto pa separa nan desperdicio pa wordo procesa na un manera responsabel. E iniciativa aki ta parti di e campaña nacional Limpi Limpi, cu tin como meta promove habitonan di separacion y stimula responsabilidad propio di desperdicio pa un economia circular na Aruba.

Den oranan di madruga partnersnan a cuminsa prepara e Veld di Undesa pa por maneha e fluho di autonnan cu lo mester a haci uzo di e bakinan di separacion. Tambe mester a percura pa facilita e caminda pa ora trucknan mester reemplasa e baki yen pa un baki bashi. Pa 7'or di mainta Bureau City Inspector a habri e parke di separacion unda a guia e ciudadanonan pa por entrega nan desperdicio di metal, e-waste, azeta di cushina, taira, carton, construccion, greenwaste y bulkwaste. Tur e tiponan di desperdicio ricibi tin un destinacion cu lo por encontra riba pagina di web www.limpi.aw. Tambe por bishita e pagina menciona pa e fechanan di Baki den Bario.

Ministerio di Naturalesa ta continuamente trahando pa fortifica e campaña nacional Limpi Limpi pa combati e problema di entre otro dump ilegal y e comportamiento di tira sushi riba caya y bandi lama. Den colaboracion cu otro departamentonan di naturalesa a bin ta identifica diferente di e dumpnan ilegal y e esnan cu ta responsabel pa e actonan aki. E instancianan concerni a wordo informa pa tuma accion y atende debidamente cu e situacionnan aki.



Maneho di desperdicio ta un proceso dinamico cual ta encera diferente pasonan pa por yega na un sector di desperdicio robusto y circular. Na mei ultimo a cuminsa cu e Circular Assessment Protocol (CAP) hunto cu Impact Blue. E CAP ta un modelo scientifico cu a wordo desaroya door di e Circularity Informatics Lab na University of Georgia. E evaluacion circular aki lo provee datonan crucial dirigi riba reduci desperdicio cu ta termina den nos medio ambiente y tambe promove e maneho di materialnan cu por wordo recupera.

Ministerio di Naturalesa ta reconoce cu cada cambio positivo ta tuma su tempo. Ministerio ta trahando riba solucionnan a termino corto, mediano y largo plaso. E caminda pa un economia circular ta uno largo y dificil pero cu siguramente ta bale la pena pa cana. E meta ta pa crea un Aruba cu nos tur por ta orguyoso di dje. Cu un compromiso continuo na protege y preserva nos medio ambiente y naturalesa. Minister Arends ta encurasha tur miembro di nos comunidad pa uni na e esfuersonan pa logra un Aruba limpi limpi. ■■■

Minister Ursell Arends:

PROYECTO DI AGROFORESTERIA; E CAMINDA PA UN CAMBIO FUNDAMENTAL DEN NOS SECTOR AGRICOLA



Aña pasa a inicia e prome fase di e bunita proyecto di agroforesteria unda cu a instala un hardin di alimentacion na 11 scol basico rond di nos isla. Cuminsando na luna di januari, Ministerio di Naturalesa en conhunto cu Santa Rosa y Living Soil Aruba, a instala 10 hardin di alimentacion na diferente scol basico rond di nos isla incluyendo un na IPA.

E metodo di agroforesteria syntropico cu a wordo implementa na cada un di e hardinnan aki ta uno unda cu e matanan di e hardin ta brinda otro nutricion y apoyo. E hardin ta wordo diseña y planea di tal manera cu su so por mantene su mes cu asistencia minimo di hende. Ademá, e espacio rekeri pa un sistema di agroforesteria syntropico no mester ta grandi. Pues e ta un proyecto cu facilmente por wordo cuminsa na cas of oficina di trabou.

E meta di e proyecto aki ta pa inculca practicanan cu lo yuda nos pais yega na un nivel mas halto di siguridad di alimentacion y un posibel pilar economico nobo. E muchanan cu a wordo introduci na e proyecto aki, cu awor ta den e miles, por siña di agricultura y kisas participa den e sector aki ariba nan mes den algun futuro.



Ministerio di Naturalesa ya a cuminsa cu e di dos fase di e proyecto aki unda cu scolnan secundario, instancianan social, centronan di bario y comunidnan di vecindario lo ricibi nan mes un hardin. Di e manera aki ta busca pa trece un cambio grandi den nos comunidad y diversifica nos economia cu local cu nos mes ta planta y cosecha. ■■■



Durante conferencia di prensa Minister Maduro di Finansa a anuncia cu:

REPARATETOESLAG PA PENSIONADONAN TA BIRA 200 FLORIN PA LUNA



Diaranson mainta durante conferencia di prensa Minister Maduro di Finansa a anuncia cu e Reparatioeslag pa Pensionado ta subi cu 30 florin y ta bira 200 florin desde augustus 2024.

E mandatario a splica cu durante e Cambio di Presupuesto 2024 a indica cu Gobierno lo pone suma disponibel pa asina por subi e Reparatioeslag di Pensionado y Trahadornan, pero a keda pendiente pa haci e calculonan necesario pa stipula con hopi por subi e ayudo aki cu Gobierno ta brinda na pensionadonan cu ta ricibi AOV y AWW y tambe na trahadornan cu ta gana un salario mas abou cu 2500 florin pa luna.

Pa locual ta trata e pensionadonan, Minister Maduro a informa cu tin un aumento di 30 florin riba e 170 florin di Reparatioeslag desde augustus 2024. Esaki kiermeen cu tur pensionado di SVB lo cobra e suma di 200 florin na Reparatioeslag ora e pago di pensioen pasa riba dia 31 di juli 2024. Segun SVB a informa, un total di 19.548 pensionado di AOV y 1.336 pensionado di AWW ta cobra e 200 florin.

Minister Maduro a indica cu e Reparatioeslag pa trahadornan cu ta gana menos cu 2500 florin pa luna ta subi cu 50 florin y ta bira 175 florin desde augustus 2024. Pa cu esaki e mandatario a informa cu den e dianoan nos dilanti e tabel di Departamento di Impuesto lo keda publica pa oficialisa e subida aki.



2024
PRESUPUESTO

31 DI JULI 2024

EHECUCION PRESUPUESTO 2024

SUBIDA REPARATETOESLAG PA PENSIONADO



2024
PRESUPUESTO

EHECUCION PRESUPUESTO 2024

SUBIDA REPARATETOESLAG PA PENSIONADO

Suma di Reparatioeslag	
2011	50 Florin
2013	100 Florin
2018	125 Florin
2023	170 Florin
Desde augustus 2024	200 Florin



2024
PRESUPUESTO

EHECUCION PRESUPUESTO 2024

SUBIDA REPARATETOESLAG PA PENSIONADO

Reparatioeslag ta bira **200 florin pa luna** desde augustus 2024.

Pa pensionado ta pone **360 florin extra pa aña** disponibel pa asina por subi reparatioeslag cu **30 florin pa luna**.

En total cada pensionado lo ricibi **2400 florin pa aña** na reparatioeslag.



PARLAMENTARIO AQUANNETTE GUNN TA USA CARTA DI EXTRIMISTA PA POR CREA PANICO BOU PUEBLO DI ARUBA ENCUANTO VACUNA



Minister di Turismo y Salud Publico sr. Dangui Oduber a entrega dia 25 di juli contesta na parlamentario sra. Gunn, cu a haci 20 pregunta tocante vacunacion. Sra. Gunn a referi na 4 carta cu a wordo dirigi entre parlamentario di Hulanda esta sr. M. De Graaff pa e agencia EMA (European Medicines Agency) cual ta e agencia Europeo responsabel pa autorisa y monitorea medicina y vacuna riba e mercado Europeo. Den e carta ta ser pidi aclaracion riba problema y consecuencia cu e vacunanan contra COVID-19 lo a crea.

Mester remarca cu e prome carta a wordo scirbi door di entre otro sr. De Graaff, cual persona anteriormente tawata afilia cu e partido controversial Forum di Democrasia. E persona aki awordo descredita como sospechoso di a ricibi soborno di Rusia relaciona cu influencia Ruso y intento di distrui politica Europeo. Mescos tambe algun otro personanan cu a firma e carta aki, manera Joachim Kuhs y Francesca Donato, cual 2 personanan tambe a wordo descredita door di tin posicionnan extremista.

Cu esaki Minister Oduber ta bisa cu e ta hopi preocupa cu sra. Gunn lo ta afilia cu partidonan extremista aki y ta sigui

e ideanan di partidonan y individuonan cu ta boga pa mete cu Rusia y asina destrui democracia.

Minister Oduber no ta comprende cua consecuencianan di vacuna sra. Gunn ta referi na dje. E vacunacion na Aruba a yuda proteha nos pueblo contra COVID-19 y asina yuda Aruba sali positivo for di e pandemia. E vacuna a yuda nos Aruba cu recuperacion. Ta parse cu sra. Gunn no a haci su huiswerk y mas bien a fungi como un vocero di extremistanan y hendenan basta dudoso.

Den Minister Oduber su contesta na parlamentario sra. Gunn a entrega dato tambe

pa muestra cu despues di e periodo di vacuna, no tawata tin, ni tin awendia, ningun morto registra cu ta muestra di ta causa pa e vacuna contra COVID-19. Hendenan cu a fayece di covid cu tawata vacuna tur tawata tin co-morbiditeit (otro malesanan cronico) serio. Datonan ta muestra cu juist mortonan despues di 2020 tawata menos tur aña, dus e ponencia cu e vacuna lo a causa mas morto no ta klop. Si ponencia di sra. Gunn ta cuadra cu e vacuna lo a causa cu mas persona a fayece e ora e cifranan di cantidad di fayecidonan despues di Covid lo mester a demostra esey tambe cual NO ta e caso!

- * Het aantal sterfgevallen in 2021 was 964
- * Het aantal sterfgevallen in 2022 was 879
- * Het aantal sterfgevallen in 2023 was 814

Minister Oduber ta lamenta cu un miembro di parlamento di Aruba ta presta su mes pa haci acusacionnan asina serio sin por prueba esaki. Ta preocupante tambe cu e sentimentonan di sra. Gunn, cual ta referi na cartanan di un partido cu personanan extremista, ta crea duda y sembra panico den nos comunidad sin ningun motibo. ■■■



MINISTER ENDY CROES TA FELICITA SR. MANUEL DA SILVA CU E RECONOCIMIENTO PA SU CONTRIBUCION VALIOSO DEN DESAROYO DI DEPORTE DI PAIS ARUBA

Diasabra anochi, den Club Caiquetio a tuma luga WKA Fight Aruba titula: "The Steam is Hot" organisa pa WKA Aruba. Un total di 22 atleta di entre otro, Bermuda, Canada, Colombia, Curaçao, Surinam y Aruba a bataya pa conquista e titulo maximo. E publico presente por a presencia 11 tremendo pelea di Muay Thai y boxeo. Rondona pa amigo y famia WKA Aruba a sorprende Sr. Manuel da Silva cu un reconocimiento pa su dedicacion y aporte durante 15 aña na e organizacion y disciplina di Muay Thai y boxeo. Alabes, den nomber di Gobierno di Aruba, Minister Endy Croes a un presenta un reconocimiento na Sr. da Silva pa su contribucion valioso den desaroyo di den deporte di Aruba.



Manuel no ta un persona desconoci den e mundo deportivo, e tin un pasion enorme pa deporte. Manuel tabata practica e disciplina di judo y ta gusta e mundo di drag race. Ademá di esaki, Sr. da Silva tin programa deportivo na radio y television. Fuera di esaki, Manuel tin un amor y pasion pa entre otro, boxeo. E mandatario di Deporte di profundidad di su curason a felicita y gradici Manuel pa su aporte y dedicacion den e deporte di Aruba y ta felicit'e cu e reconocimiento aki. Danki pa dedica gran parti di bo bida na desaroyo di deporte di Aruba. Minister Endy Croes ta felicita Manuel cu e bunita edad di 70 aña y cu Papa Dios sigui drama su bendicion riba dje. Masha pabien! ■■■



2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

